

明史

明史

清 張廷玉等撰

第 四 冊
卷四〇至卷四六（志）

中華書局

明史卷四十

志第十六

地理一

自黃帝畫野置監，唐、虞分州建牧，沿及三代，下逮宋、元，廢興因革，前史備矣。明太祖奮起淮右，首定金陵，西克湖、湘，東兼吳、會。然後遣將北伐，并山東，收河南，進取幽、燕，分軍四出，芟除秦、晉，訖於嶺表。最後削平巴、蜀，收復滇南。禹跡所奄，盡入版圖，近古以來，所未有也。

洪武初，建都江表，革元中書省，以京畿應天諸府直隸京師。後乃盡革行中書省，置十三布政使司，分領天下府州縣及羈縻諸司。又置十五都指揮使司以領衛所番漢諸軍，其邊境海疆則增置行都指揮使司，而於京師建五軍都督府，俾外都指揮使司各以其方附焉。咸祖定都北京，北倚羣山，東臨滄海，南面而臨天下，乃以北平爲直隸，又增設貴州、交趾二布

政使司。仁宣之際，南交屢叛，旋復棄之外徼。

終明之世，爲直隸者二：曰京師，曰南京。爲布政使司者十三：曰山東，曰山西，曰河南，曰陝西，曰四川，曰湖廣，曰浙江，曰江西，曰福建，曰廣東，曰廣西，曰雲南，曰貴州。其分統之府百有四十，州百九十有三，縣千一百三十有八。羈縻之府十有九，州四十有七，縣六。編里六萬九千五百五十有六。而兩京都督府分統都指揮使司十有六，行都指揮使司五，曰北平，曰山西，曰陝西，曰四川，曰福建，留守司二。所屬衛四百九十有三，所二千五百九十有三，守禦千戶所三百一十有五。又土官宣慰司十有一，宣撫司十，安撫司二十有二，招討司一，長官司一百六十有九，蠻夷長官司五。其邊陲要地稱重鎮者凡九：曰遼東，曰薊州，曰宣府，曰大同，曰榆林，曰寧夏，曰甘肅，曰太原，曰固原。皆分統衛所關堡，環列兵戎。綱維布置，可謂深且固矣。

計明初封略，東起朝鮮，西據吐番，南包安南，北距大磧，東西一萬一千七百五十里，南北一萬零九百四十里。自成祖棄大寧，徙東勝，宣宗遷開平於獨石，世宗時復棄哈密、河套，則東起遼海，西至嘉峪，南至瓊崖，北抵雲朔，東西萬餘里，南北萬里。其聲教所訖，歲時納贄，而非命吏置籍，侯尉羈屬者，不在此數。嗚呼盛矣！

論者謂交趾之棄，未爲失圖，而開平近遷，則守衛益薄，雖置萬全都指揮使司，不足以

鎮伏山後諸部，故再傳而有土木之變。然睿皇自以失律蒙塵，非由經制未備。景帝任賢才，修守禦，國步未移，乘輿旋復。由是觀之，三衛者，一隅之隘，而無關大計也。審矣。至其季世，流寇首禍於西陲，浸尋蔓延，中原爲之糜爛。金湯之固不足以制土崩，版宇之廣不足以成犄角。疆圉不蹙於曩時，形勝無虧於初盛，而強弱懸殊，興亡異數者，天降喪亂，昏桮內訌，人事之乖，而非地利之失也。語曰「在德不在險」，詎不信夫。

今考其升降之差，沿革之故，具著於篇。作地理志。

京師 南京

京師 禹貢冀、兗、豫三州之域。元直隸中書省。洪武元年四月分屬河南、山東兩行中書省。二年三月置北平等處行中書省，治北平府。先屬山東、河南者皆復其舊。領府八，州三十七，縣一百三十六。八月置燕山都衛。與行中書省同治。八年十月改都衛爲北平都指揮使司。九年六月改行中書省爲承宣布政使司。永樂元年正月建北京於順天府，稱爲「行在」。二月罷北平布政使司，以所領直隸北京行部；罷北平都指揮使司，以所領直隸北京留守行後軍都督府。十九年正月改北京爲京師。罷北京留守行後軍都督府，直隸後軍都督

府。衛所有實土者附見，無實土者不載。罷北京行部，直隸六部。洪熙初，仍稱行在。正統六年十

一月罷稱行在，〔一〕定爲京師。府八，直隸州二，屬州十七，縣一百一十六。爲里三千二百三十

有奇。府州縣建置沿革，俱自元始。其沿革年月已見元史志者，不載。其未見元史志及明改元舊，并新增、新廢者，悉

書。北至宣府，外爲邊地。東至遼海，與山東界。南至東明，與山東、河南界。西至阜平，與山西界。洪

武二十六年編戶三十三萬四千七百九十二，口一百九十二萬六千五百九十五。

順天府元大都路，直隸中書省。

洪武元年八月改爲北平府。十月屬山東行省。二年三月改屬北

平。三年四月建燕王府。永樂元年正月升爲北京，改府爲順天府。永樂四年閏七月詔建北京

宮殿，〔二〕修城垣。十九年正月告成。宮城周六里一十六步，亦曰紫禁城。門八：正南第一重曰承天，第二重曰端

門，第三重曰午門，東曰東華，西曰西華，北曰玄武。宮城之外爲皇城，周一十八里有奇。門六：正南曰大明，東曰東

安，西曰西安，北曰北安，大明門東轉曰長安左，西轉曰長安右。皇城之外曰京城，周四十五里。門九：正南曰麗正，

正統初改曰正陽；南之左曰文明，後曰崇文；南之右曰順城，〔三〕後曰宣武；東之南曰齊化，後曰朝陽；東之北曰東

直；西之南曰平則，後曰阜成；西之北曰彰儀，〔四〕後曰西直；北之東曰安定；北之西曰德勝。嘉靖三十二年築重

城，〔五〕包京城之南，轉抱東西角樓，長二十八里。門七：正南曰永定，南之左爲左安，南之右爲右安，東曰廣渠，東之

北曰東便，西曰廣寧，西之北曰西便。領州五，縣二十二。弘治四年編戶一十萬五百一十八，口六

十六萬九千三十三。萬曆六年，戶一十萬一千一百三十四，口七十萬六千八百六十一。

大興倚。東南有大通河，亦曰通惠河，水自玉河出，繞都城東南，下流至高麗莊，入白河，卽元運河也。又有玉

河，源自玉泉山，流經大內，出都城東南，注大通河。

宛平倚。西山在西。〔六〕有桑乾河出山西馬邑縣，流千里入京師宛平縣境。出盧溝橋下，又東南分爲二：一至通

州，入白河；一至武清小直沽，合衛河，入於海。又有沙河、高粱河、清河，皆在西北。西又有沿河口守禦千戶所，有盧溝、王平口、石港口、齊家莊四巡檢司。

良鄉府西南。有琉璃河，卽古聖水，下流入淀。北有天津關。

固安府西南。元固安州。洪武元年十二月降爲縣。西南有拒馬河，卽涿水。源自代郡，下流合易水爲白溝，入三角淀。

永清府南。南有拒馬河。

東安府東南。元東安州，治在西。洪武元年十二月降爲縣。三年徙今治。南有鳳河，卽桑乾分流，南入三角淀。

香河府東南。元屬鄆州。洪武十年二月省入州。十三年二月復置，改屬府。西有板罾口河，源出通州東之孤山，經縣界，入於白河。

通州 洪武初，以州治潞縣省入。西有通惠河，西南有潞河，卽桑乾，至州東張家灣，俱合於白河。有張家

灣巡檢司。西南有弘仁橋巡檢司。西距府四十里。領縣四。

三河州東。北有洵河。又西有洵河，西南有鮑丘河，一名矣榆河，卽東潞水，俱流入於洵河。西有泥窪鋪巡檢司，後移於夏店鋪。

武清州南。元屬涿州。洪武十二年來屬。有三角淀，在縣南，卽古之雍奴，周二百餘里，諸水所聚。有直沽，在縣東南，衛河、白河、丁字沽合流於此入海。有巡檢司。又東北有河西務，東南有楊村二巡檢司。

灤縣州南。元灤州。洪武十四年二月降爲縣來屬。有灤河，一名新河，東入於白河，卽盧溝之下流。

寶坻州東南。元直隸大都路。洪武十年二月來屬。東有潮河。南有洵河。又縣東南有梁城守禦千戶所，建文

二年，燕王置。有蘆臺巡檢司。

霸州 洪武初，以州治益津縣省入。拒馬河舊在北，後徙治南。又南有沙河。東有苑家口巡檢司。北

距府二百十里。領縣三。

文安州南，少東。西有易水。東北有得勝、火燒等淀。

大城州東南。東北有黃汊河，源自交河，分流至縣境，入三角淀。

保定州南，少西。洪武七年九月省入霸州。十三年十一月復置。玉帶河在北，東流入會通河。西南有磁河，東南

與玉帶河合。

涿州 洪武初以州治范陽縣省入。西有獨鹿山。北有涿水，西北有挾河，合焉。南有范水。東北距府

百四十里。領縣一。

房山州北，少西。西有大房山。北有大安山。西南有青龍潭，其下流爲挾河，一名韓村河，至涿州與胡良河合。北有磁家務巡檢司。

昌平州元昌平縣，直隸大都路。正德元年七月升爲州，旋罷。八年復升爲州。舊治白浮圖城，景泰

元年築永安城於東，三年遷縣治焉。北有天壽山，成祖以下陵寢咸在。東南有白浮山。西南有駐蹕山。又南有榆河，一名溫餘河，下流爲沙河，入於白河。又東南有鞏華城，嘉靖十九年築。東北有黃花鎮。弘治中，置渤海守禦千戶所於此，萬曆元年移於慕田峪，四年復故。西有鎮邊城，又有常峪城，俱正德十年五月築，各置守禦千戶所。又有白陽守禦千戶所，亦正德中置。西北有居庸關。南距府九十里。領縣三。

順義州東，少南。元順州。洪武元年十二月改爲順義縣，屬府。正德元年七月來屬。東有白河，西南有榆河，又有潮河，俱流入焉。

懷柔州東北。洪武元年十一月省入檀州。十二月復分密雲、昌平二縣地置，屬府。正德元年七月來屬。東有黍谷山。西有白河。

密雲州東北。元檀州，後置縣，爲州治。洪武元年十一月省縣入州。十二月復置縣，省州入焉，屬府。正德元年七月來屬。南有白檀山。西有白河。東有潮河。北有古北口，洪武十二年九月置守禦千戶所於此。三十年改爲密雲後衛。又有石塘嶺、牆子嶺等關。

薊州洪武初，以州治漁陽縣省入。西北有盤山。東北有崆峒山。又洵水在北，沽河在南。州北有黃崖

峪、寬佃峪等關。東又有石門鎮。西距府二百里。領縣四。

玉田州東南。東北有無終山，又有徐無山。又東有梨河。北有漚水。東南有興州左屯衛，永樂元年自故開平境移置於此。

豐潤州東南。南有沙河。西南有漚水。

遵化州東。東北有五峯山。南有靈靈山及龍門峽。又東有灤河。西南有梨河。北有喜峯口、馬蘭峪、松亭等關。

平谷州西北。洪武十年二月省入三河縣。十三年十一月復置。東南有洵河，又有洳河。西北有營州中屯衛，永樂元年自故龍山縣移置於此。又東有黃松峪關，與密雲縣將軍石關相接。

保定府元保定路，直隸中書省。洪武元年九月爲府。十月屬河南分省。二年三月來屬。領州三，縣十七。東北距京師三百五十里。弘治四年編戶五萬六百三十九，口五十八萬二千四百八十二。萬曆六年，戶四萬五千七百一十三，口五十二萬五千八十三。

清苑倚。北有徐河，一名大冊水，自滿城經縣北至安州，東入淀。又西有清苑河。又南有張登巡檢司，嘉靖十三年自滿城縣方順橋移置於此。

滿城府西，少北。洪武十年五月省入慶都縣。十三年十一月復置。北有徐河。南有方順河。

安肅府北，少東。元安肅州。洪武二年七月降爲縣。易水在北。曹河在南。徐河在西。西南又有鮑河。又西有

遂州，元屬保定路。洪武初降爲縣。八年二月省。

定興府北，少東。元屬易州。洪武六年五月改屬府。西有拒馬河，卽涑水也。又易水自西來，合焉，謂之白溝河。南有河陽巡檢司，後移於清苑縣界之固城鎮。

新城府東北。元屬雄州。洪武初屬北平府。六年五月改屬府。南有白溝河。西南有巨河鎮巡檢司。

雄府東北。元雄州。洪武二年七月省州治歸信縣入焉。七年四月降爲縣。北有白溝河。南有瓦濟河。

容城府東北。元屬雄州。洪武七年四月省入州。十三年十一月復置，來屬。舊治在拒馬河南，景泰二年遷於河北。西有易水，又有濡水。

唐府西，少南。西北有大茂山，卽恒岳也，東麓有岳嶺口巡檢司。又唐河在西，源出恒山，流經定州曰澧水，下流合於南易水。又西北有倒馬關，有巡檢司，後移於縣西之橫河口。又有周家鋪、軍城鎮二巡檢司。

慶都府西南，南有唐河。北有祁水。

博野府南。舊治在今蠡縣界，直隸保定路。洪武元年徙今治，改屬祁州。六年五月還屬府。西北有博水。南有唐河，亦曰澧水。又有永安鎮巡檢司，有鐵燈盞巡檢司。

蠡府南，少東。元蠡州，屬眞定路。洪武二年七月來屬。八年正月降爲縣。楊村河在南，滋、沙、唐三河之下流也，俗亦謂之唐河。

完府西。元完州。洪武二年七月降爲縣。西有伊祁山，祁水出焉，其下流爲方順河。

祁州 洪武二年七月以州治蒲陰縣省入。北有唐河，西南有滋河，至州東南合沙河，流入易水。北距府百二十里。領縣二。

深澤州南，少西。西有滋河。

束鹿州東南。北有故城。今治，天啓二年所徙。滹沱河在南。又南有百天口巡檢司。

安州 洪武二年七月以州治葛城縣省入。七年降爲縣。十三年十一月復升爲州。北有易水，府境九河之水所滙也，下流至雄縣南，爲瓦濟河。西距府七十里。領縣二。

高陽州南。元屬安州，洪武六年五月改屬府。尋屬蠡州。八年正月省入蠡縣。十三年十一月復置，還屬。故城在東，洪武三年圯於水，遷於今治。東有馬家河，其上流爲蠡縣之楊村河。

新安州東，少北。元直隸保定路。洪武七年七月省入安州。十三年十一月復置，來屬。西有長流河，一名長溝河，其上源爲鮑河。南有曹河，又有徐河，經縣南，合流爲溫義河，又南與長流河合，又東南入於瓦濟河。

易州 洪武初，以州治易縣省入。西南有五迴山，雷溪出焉，徐河之上源也。西北有窮獨山，濡水所出。又有易水，出州境之西山，與濡水並東流，而爲白溝河，所謂北易水也。又有雹水，一名鮑河，出縣西南，東南流爲長流河，所謂南易水也。西有紫荆關，洪武中置守禦千戶所於此。又有官座嶺、五迴嶺、金陂鎮、奇峯口、塔崖口、五巡檢司。南距府百二十里。領縣一。

涑水州東北。東有涑水，亦曰拒馬河，源出山西代郡，下流合易水。北有乾河口，西北有黃兒莊二巡檢司。

河間府 元河間路，直隸中書省。 洪武元年十月爲府，屬河南分省。二年三月來屬。領州二，縣十

六。北距京師四百十里。弘治四年編戶四萬二千五百四十八，口三十七萬八千六百五十八。萬曆六年，戶四萬五千二十四，口四十一萬九千一百五十二。

河間倚。西南有漳沱河。西有滏水。西南有景和鎮巡檢司。

獻府南。元獻州。洪武初，省州治樂壽縣入焉。八年四月降爲縣。有漳沱河自代郡流入境，經縣南，至青縣合衛河達於海。有單家橋巡檢司。

阜城府南。元屬景州。洪武七年改屬府。西北有胡盧河，卽禹貢衡漳水。

肅寧府西。中堡河在縣東。

任丘府北，少西。元屬莫州。洪武七年改屬府。西北有瓦濟河，下流爲五官淀，注於漳沱河。北有莫州，元治莫亭縣，屬河間路。洪武七年七月，州縣俱省。

交河府東南。元屬獻州。洪武八年四月改屬府。十年五月省入獻縣。十三年十一月復置。東有衛河，源自衛輝，流入故城境，經縣東，過滄州，又東北至直沽入海，一名御河。又西北有高河，經縣南，合漳沱，謂之交河，下流入衛縣，以此名。又南有洛河。又東有泊頭鎮巡檢司。

青府東北。元清州。〔七〕洪武初，以州治會川縣省入。八年四月降爲縣，尋改清爲青。漳沱河自縣南流入衛，謂之

岔河口。其支流經縣之北者，曰獨流河。

與濟元屬清州。洪武初省。十三年復置，屬府。衛河在城西。

靜海府東北。元曰靖海，屬清州。洪武初，更名。八年四月改屬北平府。十年五月來屬。縣北有小直沽，衛河自

西來，與白河合，入於海。又有丁字沽、鹹水沽。又北有天津衛，永樂二年十一月置。

寧津府東南。南有土河，自山東德州流入，又東入山東樂陵縣界。

景州。洪武初，以州治蓆縣省入。東有衛河。東北有胡盧河。又東有安陵，西北有宋門二巡檢司。又東

北有李晏鎮。西北距府百八十五里。領縣三。

吳橋州東，少南。西有衛河。

東光州東北。洪武七年七月省入阜城縣。十三年十一月復置。南有衛河，又有胡盧河。

故城州南，少西。有衛河，自山東武城縣流入境。又西南有索盧枯河。

滄州。洪武初，以州治清池縣省入。舊治在東南。洪武二年五月徙於長蘆，即今治也。東濱海。西有

衛河。南有浮河。北有長蘆巡檢司。西距府百五十里。領縣三。

南皮州西南。衛河在縣西。

鹽山州東南。東濱海，產鹽。東南有鹽山。

慶雲州東南。洪武六年六月析山東樂安州北地置，來屬。

眞定府 元眞定路，直隸中書省。洪武元年十月爲府，屬河南分省。二年正月屬山東。三月來屬。領州五，縣二十七。東北距京師六百三十里。弘治四年編戶五萬九千四百三十九，口五十九萬七千六百七十三。萬曆六年，戶七萬四千七百三十八，口一百九萬三千五百三十一。〔廿〕

眞定倚。漳沱河在城南。又北有滋河，自山西靈丘縣流入，經行唐縣之張茂村伏流不見，至府北南孟社復出，下流合於南易水。

井陘府西南。元屬廣平路威州。洪武二年來屬。東南有城山，又有甘洵河，亦名冶河，南與綿蔓水合。又故關在其西。

獲鹿府西南。西有抱犢山，有西屏山。又有蓮花山，白鹿泉出焉，東流爲西河，卽洺水上源也。又有土門關在西，亦曰井陘關。

元氏府西南。西北有封龍山，泚水所出，下流入胡盧河。西南有槐水，下流曰野河。

靈壽府西北。東北有衛水，〔一〇〕源出恒山，禹貢「恒，衛旣從」卽此。俗名雷溝河，東北入於漳沱。北有叉頭鎮巡檢司，後遷於慈峪鎮。

藁城府東南。北有漳沱河，又有滋河。

欒城府南。縣北有故城，今治洪武初所徙。西有汶河。

無極府東，少北。元屬中山府。洪武初廢。四年七月復置，屬定州。七年四月改屬府。南有滋河。

平山府西，少北。北有漳沱河，東北有冶河入焉。西北有房山。西有十八盤，下口村巡檢司。

阜平府西北。東北有大茂山。北有派河。西有龍泉關。

行唐府北。元屬保定路。洪武二年屬定州，正統十三年十月直隸眞定府。西有滋河。西北有兩嶺口巡檢司。

定州 元 中山府。洪武二年正月改曰定州。三年以州治安喜縣省入。澧水在北。沙河在南，下流合

於澧水。西北有倒馬關，守禦千戶所。景泰二年置關，與紫荆、居庸爲內三關。北有清風店巡檢司。西南距府百

三十里。領縣二。

新樂州西南。西南有沙河。

曲陽州西北。元屬保定路。洪武二年來屬。恆山在西北，恆水出焉。又沙河在南，自山西繁峙縣流入。

冀州 洪武二年以州治信都縣省入。西北有漳水。北有漳沱河。成化十八年，漳沱挾漳南注爲州患。正

德十二年，二水自寧晉縣南北流，患始息。又北有潞水，一名枯潞，下流合於漳。西北距府二百八十里。領

縣四。

南宮州南，少西。故城在縣西北，成化十六年遷於今治。漳水在北。潞水在南。東南有董家廟堡巡檢司。

新河州西，少南。有清水河，成化後堙。

棗強 州東，少北。西北有索盧水，乃衛河之支流也，亦曰黃盧河。

武邑 州東北。西有潯水。西北有漳水。

晉州 **洪武二年**以州治鼓城縣省入。南有漳沱河。西距府九十里。領縣三。

安平 州東北。漳沱河舊在縣南，萬曆二十三年自東鹿縣南行，始不經縣境。

饒陽 州東北。北有漳沱河。西南有饒河，即漳沱河支流也。

武強 州東。漳河在縣東。又南有漳沱河，舊合於漳，萬曆二十六年北出饒陽縣境，而縣之漳沱河始涸。

趙州 **洪武元年**以州治平棘縣省入。南有洺河，下流入於胡盧河。北距府百二十里。領縣六。

柏鄉 州南。東北有野河，即槐水也，下流入於胡盧河。

隆平 州東南。**洪武六年**九月省入柏鄉縣。十三年十一月復置。東有灋水，東北與沙河合，下流入於胡盧河。沙

河，亦槐水之別名也。又東北有大陸澤，亦曰廣阿，漳水所滙。

高邑 州西南。北有黑水，〔二〕即槐水也，流合縣南之沛水。

臨城 州西南。南有敦興山。西南有鐵山。西北有泚水，東經釣盤山下，與沛水合。

贊皇 州西南。西南有贊皇山，沛水出焉，亦曰沙水。又城北有槐水。西北有黃沙嶺巡檢司。

寧晉 州東，少南。東南有胡盧河，其上流即漳水也，深、冀羣川悉滙於此。東北有百尺口巡檢司。

深州 **洪武二年**以州治靜安縣省入。南有故城，今治本吳家莊，永樂十年遷於此。漳沱河在東北。胡盧